

COLUMNA

Cur che plets sa perdan

RITA CATHOMAS-BEARTH

Ils davos dis hai jau final-main chattà temp da guardar atras il palpìri che mia mamma aveva laschà enavos: brevs da ses du-desch fragliuns, cartas da sias otg figlias, dissegns d'uffant da sias quindesch biadias e biadis, documents da famiglia, fotografias per part vegliandras, annunzias da mort da parentella e nashientschas da sutbiadias e sutbiadis. Tut in sper e sin l'auter. Ina sistematicra n'era mia mamma betg.

Tranter auter sa chattavan en la stgatla er celdels scrits a maun dad ella sezza, format A5, stgarpads giu d'in bloc. Skizzas da brevs ch'ella aveva scrit ad insatgi. Notizias, nua ch'ella aveva mess ils daners e las clav-chasa. Tge ch'il medi aveva ditg ad ella e cura ch'ella haja da prender las pirlas. Il pli impressiunant è il feagl, sin il qual ella ha empruvà pliras giadas da notar, nua ch'ella haja mess la clav, senza savair co scriver ils plets e sche la clav saja la tastga u la tastga la clav.

Insacura aveva ella cumenzà a dissegnar miniaturas abstractas che vesan or sco avainas d'in tscharvè. Entirs feglis plains da quellas en la grondezza d'in diclar. Tuts en retscha in sper l'auter, tuts quasi



tuttina gronds, tuts cun differentes cuntegns. Sco sch'ella avess vulì decifrar quai che succedeva en ses chau. Jau pens ch'ella ha cumenzà cun quests dissegns, cur ch'ella ha senti che ses tscharvè sa mida.

Mai ch'ella avess laschà sentir sia famiglia, co ch'ella sa sentiva. I ha cuzzà ditg, fin ch'jau, ch'era pauc a chasa, hai realisà che mia mamma na chapiva betg pli tut, ch'ella tschertgava pli e pli ils plets. Ella aveva chattà ina buna strategia da zuppentar las mancanzas. Pir suenter la mort anetga da noss bab avain nus figlias propi realisà la dimensiun da la demenza da nossa mamma.

Tranter sias scrittiras sa chattava er in diari ch'ella aveva scrit cun 70 onns. Ella era lura circa en la vegliadetgna ch'jau sun

oz. Forsa aveva ella già senti ch'ella cumenza ad embli-dar. En mintga cas ha ella durant in onn scrit si tut quai ch'ella e noss bab, tschintg onns pli vegl, traf-fitgavan di per di.

Sco sche nagut na fiss sa midà en sia vita, fascheva la mamma il perchasa, tgrava l'iert, sterilisava e schelentava, nettegiava, lavava la vestgadira, preparava ils letgs e la chasa da vacanzas per sias figlias, cuschinava per las visitas, quai tut sper messas e rusaris, gitas qua e là ch'ella amava er fitg. Sco er jau hai mintgatant la tendenza, na vuleva er ella betg conceder a sasezza la vegliadetgna e trottar sco adina.

Il palpìri e las scrittiras da mia mamma èn per mai ina vaira revelaziun e m'han avischinà ad ella anc suenter passa diesch onns ch'ella ha bandunà quest mund. Oz rimnain nus fotografias. Scrittiras dentant reveleschan mintgatant da quai che vegn cuschentà durant la vita. Jau sun engraziavla per tut quai che mia mamma ha notà da sasezza e da sias activitads, tantpli ch'ella ha ils davos onns da sia vita pers plaun a plaun ils plets.

Rita Cathomas-Bearth è creschida si a Rabius, viva a Cuira e s'occupa cun dunnas e cultura.